

馬來西亞萬撓佛教會蔡文端翻譯-2022/10/31 更新版--出大隨求陀羅尼經

喃謨世尊功德藏廣博如虛空，微笑面殊勝身金色摩尼寶光焰照耀，身形無量由旬高大無畏勇猛威德力莊嚴王如來【誦七遍】【2022/10/31 日 12.35 P.M.更新版】

Namo bhagavate guṇa-ālaya-vistīrṇa-ākāśa-upama, mukha-prahasita-deha-viśeṣa-kāñcana-maṇi-ratna-jvalita-avabhāsa, veṣa-ananta-yojana-br̥had-acchambhita-tejo-bala-vyūha-rājāya tathāgatāya arhate samyak-sambuddhāya.

不空摩尼供養功德藏廣博如虛空，微笑面殊勝身金色摩尼寶光焰照耀，身形無量由旬高大無畏勇猛威德力莊嚴王如來真言【誦七遍】

Om, amogha maṇi-pūjā mantra prasava vi-kurvite, samanta guṇa-ālaya-vistīrṇa-ākāśa-upama, mukha-prahasita-deha-viśeṣa-kāñcana-maṇi-ratna-jvalita-avabhāsa, veṣa-ananta-yojana-br̥had-acchambhita-tejo-bala-vyūha-rāja tathāgata viṣayam ā-bharaṇa gandha-sugandha maṇi-ratna gandha-puṣpa pra-varṣaṇa svāhā.

纔說此四大陀羅尼已，一切諸佛、諸大菩薩、聲聞，異口同音，說此大隨求大明王無能勝陀羅尼甲冑密言句，以一切如來印印之。此甚難得聞，何況書寫受持讀誦為他宣說，是故當知，是大佛事，如來深心讚歎說隨喜者，極難得聞。此大隨求大無能勝陀羅尼名，極難得聞，極甚難得，能盡諸罪，大力勇健，具大威德神力，能生無量功德，能摧一切魔眾，能斷一切習氣及魔羅網；能除他真言、毒壓、禱藥法、相憎法、降伏法，能令惡心眾生起大慈心，能護愛樂供養佛菩薩聖眾之人，能護書寫受持讀誦聽聞大乘經典者，又能滿足修佛菩提者。大梵！持此大隨求無能勝明王，不被沮壞，於一切處，獲大供養，如佛大師兩足尊。云何得知？此明王能摧一切諸魔？大梵！過去有佛，號《廣博微笑面金色摩尼寶光焰照耀高勇王如來應正覺》，初成道時，往詣菩提場欲轉法輪。爾時一切魔并無量俱胝那庾多眷屬圍遶，現種種形作可畏聲，示種種魔境現作神通，雨種種器仗，來往四方而作障難。

爾時《廣博微笑面金色摩尼寶光焰照耀高勇王如來》，於須臾頃寂然而住，意誦此大隨求大明王無能勝大陀羅尼七遍。纔誦此陀羅尼已，於剎那頃，一切魔波旬見彼如來一一毛孔，出無量俱胝百千那庾多金剛使者，身彼甲冑，放大光明，各持刀劍、鉞斧、網索、杖棒、三戟叉，各出如是言：捉縛惡魔，摧惡心者，斬斷其命，粉碎諸魔作如來障礙者。即彼一切難調惡魔，以如來大威力，於毛孔中出大丈夫，是諸魔眾悶絕擗地，皆失自性神通，四散馳走。如來以大慈劍，得勝魔境，成無上菩提，即轉無上法輪，如一切佛；一切障者毘那夜迦，諸惡魔等，悉皆摧壞。如是，大梵！此陀羅尼有大勢力，能獲神通到於彼岸，若纔憶念，於危險處，皆得解脫，意樂清淨，惡心有情，起大慈心。是故大梵，常當憶念，如理作意，依法書寫，而常帶持。

復次，大梵！烏禪那城【Ujjayanī】有王，名曰梵施，彼有一人，犯王重罪。王勅殺者一人，領彼罪人，將往山中令斷其命。殺者受教，領彼罪人，至於山窟，將刀欲殺。是其罪人，先於右臂，帶此隨求無能勝陀羅尼，心復憶念，由此大明威力，其刀光焰，狀如火聚，片片段壞，猶如微塵。爾時殺者，見此事已，怪未曾有，即以上事，具白於王。其王聞已，便生大怒，復勅殺者，將此罪人，送藥叉窟，於彼窟中，有眾多藥叉，令食此罪人。受王勅已，殺者即領罪人，送藥叉窟；纔送窟中時，藥叉眾歡喜踊躍，奔走向前，欲食罪人，以彼罪人帶大隨求威德力故，時眾藥叉，見彼罪人身上有大光明，熾盛晃曜，諸藥叉眾，悉皆驚怖；各作是念：此火欲來燒我。彼藥叉眾見是事已，甚大驚怖，送此罪人，安窟門外，旋遶禮拜。

爾時使者具以上事復白於王。其王聞已，倍更瞋怒，又勅使者，縛彼罪人，擲深河中。殺者奉教往擲，纔入河中，河便枯竭，猶如陸地。時彼罪人，便住於岸，所被繫縛繩索，片片斷絕。王聞此事，極大驚怪，熙怡微笑，生大奇特，喚彼罪人，問其所緣：汝何所解？罪人白言：大王！我無所解，我於身上，唯帶大隨求無能勝大明王陀羅尼。王即讚言：甚大奇特，此大明微妙，能摧死罰。即說伽他曰：

大明甚微妙 能摧於死罰 諸佛所加持 拔濟諸有情 能解脫苦病
大明大威德 能脫非時死 大悲尊所說 能止大疾病 速證大菩提

爾時彼王歡喜踊躍，即取彼隨求供養禮拜；即以繒帛繫罪人首，與其灌頂，册封為城主【五天竺國法，若授官榮，皆以繒帛繫首，灌頂然後授職也】。如是，大梵！此大隨求無能勝大陀羅尼，若有帶者，於一切處獲大供養；難調伏惡心眾生，咸起慈心，皆相順伏，是故應常持帶此大陀羅尼。

復次，大梵！若欲帶此陀羅尼者，應擇吉日、吉宿、吉祥之時，依法書此陀羅尼。時大梵王聞是語已，甚大歡喜，五輪著地，頂禮佛足，而白佛言：以何方法，書寫此大隨求無能勝陀羅尼？

爾時如來即說伽他告大梵言；

大梵汝當知	我今為汝說	愍念諸有情	令得大安樂	遠離逼迫業	解脫諸疾病
婦人有胎孕	有情離貧匱	窮業悉皆除	當於吉宿時	布沙宿相應	應當持齋戒
而供養諸佛	發大菩提心	復生悲愍心	及起大慈心	於他思利益	遍諸有情類
龍惱麝檀香	以此香湯浴	著新淨衣服	更以燒香熏	當用瞿摩夷	塗小曼荼羅
應取五賢瓶	皆盛滿香水	雜插諸花果	置於壇四角	餘一置壇中	花鬘及燒香
及與妙塗香	應燒五味香	檀香颯畢迦	酥合沈石蜜	和合而燒之	種種諸妙花
諸花果種子	隨時而供養	塗香用嚴飾	酥蜜并乳酪	麩麥及乳糜	盛滿供養器
應量皆吉祥	以瓷瓦椀盛	四角滿香器	佉地羅木椀	釘於壇四角	用五色縷纏
於壇四角外	大梵以此儀	若求悉地者	應食三白食	書此隨求人	當於壇中坐
敷以淨茅薦	依法而書寫	或素或繒帛	或用於樺皮	或葉或餘物	寫此陀羅尼
女人求子息	當用牛黃書	中心畫童子	瓔珞莊嚴身	滿鉢盛珍寶	左手而執持

坐在蓮華上	其華而開敷	又於西隅角	而畫四寶山	其山金寶飾	慇懃應畫此
能令胎安隱	丈夫求子者	應用鬱金書	彼所求之事	悉皆得成就	於真言四面
應畫種種印	又畫於蓮華	或二或三四	乃至五蓮華	其華悉開敷	八葉具鬢藥
華莖以繒繫	華上畫三戟	戟上復繫繒	復畫於鉞斧	亦在蓮華上	又於白蓮華
於上應畫劍	復在蓮華上	而畫於商佉	所畫諸蓮華	皆在寶池內	若丈夫帶者
不應畫童子	應畫天人形	種種寶莊嚴	帝王若帶者	於中應當畫	觀自在菩薩
又於其四面	畫種種印契	若是苾芻帶	應畫持金剛	右執金剛杵	左拳豎頭指
擬彼難調者	又當於四角	而畫四天王	婆羅門帶者	畫於伊舍那	刹利若帶持
畫摩醯首羅	毘舍若帶者	畫於天帝釋	或畫毘沙門	若是首陀帶	而畫那羅延
童男及童女	畫波闍波提	青色女人帶	畫盧陀羅天	女人白色者	應畫名稱天
女人若肥充	畫彼寶賢將	瘦女人帶者	畫滿賢藥叉	若懷妊婦人	應畫大黑天
或畫梵天王	如是諸人類	各畫本所尊	依法而書寫	常帶於身上	所求悉如意
金銅作蓮華	於上安寶珠	如意火焰形	置在幢刹上	而於此珠內	安置大隨求
於是隨求中	畫彼邑城主	若是已舍宅	建此隨求刹	而畫本家主	於隨求四面
周匝畫蓮華	於華胎藥上	畫於一繖索	金剛杵及輪	棒及爍訖底	如是諸契印
各在蓮華上	刹上懸繒幡	應如法供養	由此隨求刹	能護國城邑	及以護家族
災禍悉除滅	疫病及諸疾	饑饉不流行	他敵不相侵	國土皆安樂	若遇天亢旱
并於滯雨時	應畫九頭龍	頭上有寶珠	火焰而流出	當於龍心上	畫一金剛杵
於龍身四面	寫此大隨求	置在於篋中	亦安幢刹上	應時降甘雨	滯雨即便晴
商主領眾人	或在於水陸	諸商人帶者	應畫商主形	如前安刹上	離賊及諸怖
悉皆到彼岸	是故當慇懃	帶持及讀誦	吉祥滅諸罪	若是念誦人	應畫自本尊
若日月熒惑	辰星及歲星	太白與鎮星	彗及羅睺曜	如是等九執	凌逼本命宿
所作諸災禍	悉皆得解脫	或有石女人	扇婁半婁迦	如是之人類	由帶大隨求
尚能有子息	若此類帶者	應畫九執曜	二十八宿天	中畫彼人形	所求悉如意
如世尊所說	獲得最勝處	現世及他世	常獲殊勝樂	三十三天宮	隨意而往生
悅意瞻部洲	最勝族姓家	得生如是族	或生刹利族	或婆羅門家	由帶大隨求
生此最勝處	書寫持讀誦	依法而帶之	得往安樂刹	蓮華而化生	決定無疑惑
一切諸如來	讚說斯功德	稱揚不能盡	關閉地獄門	能開諸天趣	安樂悉成就
智慧皆圓滿	諸佛及菩薩	常安慰其人	身常受快樂	驍勇有大力	如來誠言說
當獲轉輪位	安慰人天眾	驚怖惡心者	修此陀羅尼	不久當獲得	不被刀所傷
毒藥及水火	悉皆不能害	非命及夭壽	諸罪皆遠離	見聞及觸身	於一切時處
鬼魅及鬪諍	諸怖皆消滅	惡蟲及毒蛇	囚閉悉解脫	種種疾大病	悉皆盡除滅
由修持此明	於諸摩羅眾	無礙得通達	能於一切處	而獲大供養	人中得最勝

公元 2021/8/1 日擇錄自：大正新修大藏經第二十卷密教部三--藏經編號 No.1153。

萬撓佛教會網站：<https://dharanipitaka.com/>